

Karatas ezektsa bo ziwatahaka

Taparaka Deus Sudeutsa zuba nisiwatawy iwaze hi ityryktsa niyziknaha, isopykwytsa nisispirikpoko, sihyrytsa sipiakzyzykyhytsa. Iwa ityryktsa ziwatawy. Sidisahawy kino niwatihi ikaty hi ziknatahadisahakanaha sibo zuba ziknakara. Aiba Sesus Kiristu izumuze mysapyzeken nihyrikosokda iwaze asaktsa Sesus humo sispirikporëtsa myziknaha zeka Deus tuk tahawahi mynapykyryknaha. Sesus Kiristu tazo bo ziksizoze ituk zinymyrykynahatsa paikpa tisapyrëna ty niharapespirikpokonaha. Sizubarëtsa Sesus humo sispirikporëtsa, Sudeutsabyitsa tuze iwatsahi Sudeutsa sopykwy batu aha tahyrytsa ty batu isty piakzyzyk. Pauro Karatas niparakze wastuhu Sudeutsa Sesus tuktsa pe niaha. — Ahahyrytsa piak tysizyzyktaha anahi Deus myzihikik — nikaranaha. Anahi Pauro ziwabyze sibo ziwatahaka ispe niy:

— Tsimyinaha tahahyrytsa ty batu isty piakzyzyk, Sesus humo ahaspirikporëtsa tu zeka Deus harere bo zuba ma tsimykanaha anahi Deus myzihikik — niy. Iwa Deus Pauro ziapewywy iwaze aparakbaha tanymyryky.

Tapara aparakbaha bo mytsaty mykara.

¹⁻² Uta Pauro. Ikiyahatsa tsinakypkykbanahaze Deus harere tsipiwabynaha ahabo iwatahaka. Deus zikwatawy. Kytsa humo ka batu. Deus myzo hi zikwatawy iykzoho mozik. Sesus Kiristu humo kino niwatihi zikwatawy atahi Deus zihyrizikpowy. Katukytsa kabaze modyhydyhykynahatsa, asa harere ahabo piwatahakanaha. Tynakypkyk-nahatsa Karatas eze tsimaha. Tsinazuzukbanahaze Sesus harere tsipiwabynaha.

³ Ahatsyhyryze Deus bo mopamykysoko:

— O Deus myzo Sesus tuktsa Karatas ezektsa tysisapywyky. O Sesus Kiristu mypehakatsa tysiakusukniwyky — my. Iwa ahatsyhyryze Deus bo mopamykysoko.

⁴ Kiristu mysapyzekeny nihyrikosokda, kytsa zibezekena-haze hỹ zuba niy, iwatahi mysapybyitsa tsikykaranaha ihumo Deus nimyokzohik. Kiristu nihyrikosokdaze Deus nawa hi nizihikik. Iwaze mymytsumuēhī. Abaka hawa kytsa sisopyk batu tsimykaranaha, katsaktsa Kiristu humo meky watu tsimoziknaha. ⁵ Iwatsahi Deus bo tynapamykysokonahaktsa! — O Deus ikia zuba wasani tsimykara. Ika zuba tsamysapyrēta — tsimaha. Iwa hi tsimynakaranaha.

Deus wasania ty zuba my.

⁶ Kyze tubabatu Deus zahawatawy. Sesus Kiristu myzahasapywyky. Asiba Deus tsierek tsihikiknaha ana hi iwaby. Hawa tsimykaranaha batu isapy my, ana humo hi batu kahyrinymyry kapetu kasopyk:

— Nawa ha ty Karatas ezektsa soho piwabyky wasani ja. Batu kanyhy — my. Usta maku mekywaha humo pahahyrinymyryky anahumo hi yh̃ tsimykaranaha. Atahi:

— Kaharere wasani my — mybarapetu nikara. Ika hatsa iharere bo yh̃ tsimykaranaha zeka kaharere bo batu h̃ tsimaha. Kaharere humo tsimyspiriktsokdabanaha ana humo hi kamysatyharēta mykara. ⁷ Tohi harere humo batu mysopyksapy my. Deus harere ana zuba wasani my. Simyknianikitsa ustsaha harere ahabo motsasokonaha iwa tihi:

— Myharere wasani — mybarapetu mykaranaha. Asahi Deus wasania ty hi myzapywak tsihikiknaha h̃. Iwaze Deus wasania ty Sesus soho zisapybyrikinaha. ⁸ Aty zeka Deus wasania ty mekywaha tu pahahyrinymyry, iharere

mysapybyri iwaze iharere meky watu my. Iwaze Deus ispe:

— O ikiahatsa batu ahamysapy tsimaha. Sinini ykarawy bo pahapehahik — iwa Deus motsasoko zeka wasani my. Uta, katukytsa, bijoikpe iknykta iwatsa Deus wasania ty mekywahatu pahahyrinymyry zeka Deus mysininiwy bo wasani mytsaty mykara. ⁹ Tubabatu tapehawy ikt-saso. Abaka ahabo atsatu motsasokozo. Amakata ahabo mozumu zeka meky harere pahahyrinymyryky Deus hi:

— O atakta batu imysapy my. Sinini ykarawy bo pipehahik — niy. Deus wasania ty katsa botu ahabo tsikt-sasokonaha ana bo hi zuba hỹ tsimykaranaha. ¹⁰ Iwaze kino Deus wasania ty motsasokoze kytsa hi — O atakta mykparawy — iwa batu mozihihik. Deus kape my zeka:

— O atakta tsimysapyrēta — my ana hi mozihihik. Deus kasoho ty motsasoziuku zeka kakurēta h̃y. Myzubaha kasoho motsasoziukunaha zeka anahi mozihihik iwa zeka batu Sesus tsumuēh̃itsa babata ziky.

Hawa niyta Pauro Deus ykzoho niyzik.

¹¹ Kyze — O katukytsa Deus harere ahabo motsasoko kytsa harere ba ziktsaso. Ataharere bo ka kytsa batu mytsaty zikaha. ¹² Ataharere ty ka kytsa batu katy hyrinymyry. Sesus Kiristu hi zikyrinymyry h̃y.

¹³ Kasoho botu tsiwabynaha h̃y. Utakta Sudeu my. Iwatahi Moises harere bo zuba hỹ ziknakara. Sesus harere humo hỹ nikaranahatsa iksisukyryky. Asahi inauzuzukbanahaze Sesus harere ziwabykynaha asahi ziknasisukyrykik. Iwa Sesus harere bo ka ja ba h̃y zikaha mytsaty ahabyitatu ikykara. ¹⁴ Taparaktsa myzotsa harere bo pykyhytu hỹ ikykara. Aparakbaha mysopyk humo zuba yh̃y ziknakara. Katsa zuba myhyrinymyrētsa mytsaty ahabyita tu iky, iwatahi nanabyi sisopyk humo hỹ ikykara.

¹⁵ Deus hi ziksapywy. Kapurukbyizetu Deus zikwatawy. Iwaze ikypykze Deus wasania ty ustsya kytša bo zikpeha. Kakzohota tu Deus wasania ty ustsya kytša bo motsasoko.

¹⁶ Deus tatse kabo ziwatawy iwaze Deus tse zikspirikpoz-iuku. Iwatahi aparakbaha Sudeutsabyitsa bo Sesus soho iktsasoko. Iwaze aparakbaha bo batu tyso: “O amy ty Sesus soho mysihyrinymyry” — my. Iwa batu tyso.

¹⁷ Damasko eze tuze batu Serusarēhe bo zuk. Batu Sesus ykzohotsa bo kozore. Atazuba Arabija imyra zuba ha bo inakozore. Aiba tohi eze zuba Damasko bo ikziksizo.

¹⁸ Nawa harakykbyi niytyk tseheze Serusarēhe bo ikparak. Peduru bo ikumu, ituk ikapykyrykspyk mytsyhyrytsa wa ikuruze iwaze Damasko bo iksizo. ¹⁹ Serusarēhe eze tuze, ustsya Sesus ykzohotsa ty batu isty ny. Mypehakatsa Sesus ty bo zuba ikozo. Tsiaku inarokota.

²⁰ Nawa ha ty ahabo piwatahaka wasapehe mykara. Deus okzeka piwatahaka batu kamyspihikbata.

²¹ Kyze Sirija bo ikukuru. Iwaze Sirisia bo ikukuru.

²² Kytša Sesus tuktsa Sudeu Ezektsa batu katyny niaha. Asaktsa batu katy nyhabyitsa maha. ²³ Iwaze zuba kasoho ziwabynaha:

— O atakta tubabatu katsa nimysukyryikik abaka Sesus harere bo hyŷ isopyk ihumo tispirikporēta niyzik. Atahi myzuba ha bo motsasoko hawa Sesus harere bo hyŷ mykaranahaze hawa iharere bo zuba yhyŷ mykaranaha iwa motsasoko — mykaranaha. Iwa kasoho ziwabykynaha.

²⁴ Iwaze Sesus tuktsa Deus bo mosakibazikknaha:

— O Deus katsaktsa mykurētsa. Hawa tsimykara Pauro humo mykurētsa tsimozikknaha — nikaranaha.

2

Pauro ustsya sakzohotsa tuk my.

¹⁻² — Nawa niytyk tseheze kīšī ziharamuze Serusarēhe bo ikzikisizo. Deus kape niy: “Ikiakta Serusarēhe bokta!” — niy.

Hyĩ iky. Iwaze Serusarēhe bo ikparakzo. Baranabe katuk niukuru. Katsa Titu pe tsikaha.

— Iki tihikta! — tsikaha.

Hyĩ niy. Titu Sudeubyita. Iwaze katsa Serusarēhe bo tsikukurunaha. Tsikumunahaze myspirikpokotsa bo tsikaha. Katsa myspirikpokotsa bo zuba tsiktsasokonaha. Sudeutsabyitsa ikshyrinymyryky myspirikpokotsa bo iktsaso. Kaharere Sesus soho Sudeutsabyitsa bo iktsasoikik iwa sibo iktsasoko. Uta kapetu kasopyk:

— O kaharere Sesus soho bo yhĩ zikaha byizeka hawa ty iktsasoko na haka mohokda — mytsaty ikykara. Iwatahi kaharere ty sibo iktsaso. ³ Hawa niy tsapyrēna. Mytukta Titu Sudeubyita batu ipe niaha:

— O tsiptakzykikta! — maha. Iwa batu tyso. ⁴ Kytsa asahi Sesus harere bo batu hĩ zikaha iwatsahi sispirikpoz-iubyitsa tu:

— Tsiptakzykik zeka wasani my — nikaranaha. Asaktsa sisukparatsitsa. Kytsa papatu nipupunaha. Batu Sesus tuktsabyitsa maha. Katsaktsa Sesus tuk atsatu mytsaty tsimykaranaha ana hi nizokparakanaha. Sesus sopyk ty zuba tsimykaranaha iwatsahi mykurētsa hĩ. Asaktsa pykyhytu Moises sopyk bo zuba hyĩ mykaranaha katsaktsa nawa tihi ana hi nizihikiknaha. ⁵ Utakta siharere bo hĩbyri ziknakara. Katsahi:

— Deus harere ty Sesus soho wasani zuba tsimaha. Iharere bo zuba hyĩ tsimykaranaha — tsikaha. Iwaze siharere batu mywabyhy.

⁶ Asaktsa sihumo kytsa sizubarētsa myspirikpokotsa watsa mykaranaha. Asa harere ezytyk ty batu tyso. Deus okezeka kytsa batu abazubatsa maha ihumo myzubaha

astsatu maha. Iwa utakta niwatihi mytsaty mykara.
⁷ Deus wasania ty Sesus soho nitsasoikik ana soho hi:

— Ikia Deus wasania ty Sudeutsabyitsa bo motsasoko
 atsawatu Peduru Deus wasania ty Sudeutsa bo motsasoko.
⁸ Deus hi ikia zapehahik iakzohota hi Sudeutsabyitsa
 bo, izikwy atuk mynapykyryk. Astatu Deus Peduru
 zipehahik iakzohota hi Sudeutsa bo izikwy ituk my-
 napykyryk. Abaka ana humo kino tsipinymyryknaha —
 niaha. ⁹ Iwaze Tsiaku, Peduru, Suão iwatsa sispirikpokot-
 sitsa Sesus tuktsa tuk mype niaha:

— O mytukytsa Deus hi Sudeutsabyitsa bo pahapehahik
 ana hi ahyriziktsokzawy izikwy ty ahabo nyny my. Tis-
 apyrëna tsimaha — niaha. Iwatsahi mymykusukniwyky-
 naha. Mytsyhyrypetsa humo paik niaha iwaze siharerez-
 iuwyttsa niyziknaha. Kyze mype niaha:

— O ikiahatsa mytuktsa babatsa. Ikia Baranabe kino
 niwatihi Sudeutsabyitsa boktsa! Utakta katyryktsa bo
 my. Iwa wasani my. ¹⁰ Tsimykurunahaze Sudeutsabyitsa
 bo katyryktsa sinamybyitsa bo ahamytsatyhu ja ispirikt-
 sokda spiriktsoda byijataha! — niy.

— Yhÿ. Sinamybyitsa humo mymypokzitsirëtsa —
 tsikaha. Botu sinamybyitsa tsiksitsumuëhikînaha.

Pauro Peduru Sesus tuktsa okze zipehaka.

¹¹ Kyze Peduru Ātiokia bo inakozoreze Sesus tuktsa
 okze tu zipehaka. Imysapybyita hi zibetsakak. ¹² Tapara
 Peduru zumuze Sudeutsabyitsa asahi Sesus tuktsa maha
 situk tahadisahakanaha. Kyze Tsiaku itukytsa Ātiokia bo
 nisipehahik. Peduru sibo nikozoze tisikpybyrëta niyzik.
 Tapetu nikara:

— O asaktsa Tsiaku tuktsa asahi Sesus harere bo
 hyÿ nikaranahaze sispirikporëtsa. Sudeutsabyitsa
 mysipiakzyzykik tsihikiknaha iwaze kahumo

siharerewabymybarëtsa, iwatahi Sudeutsabyitsa tuk ba zikdisahazo metutu mozikdisahaka icy — niy.

¹³ Iwaze Sudeutsa Sesus harere bo hyĩ nikaranaha iwatsahi ihumo sispirikporëtsa Peduru humo sisikpybyrëtsa niyziknaha. Sispirikporëtsa nikaranaha iwatsa tu nawa ha ty batu simysapy nikaranaha. Peduru watsa nikaranaha. Hawa nikaranaha Baranabe kino niwatihi siwatu nikara.

¹⁴ Iwatahi Peduru ipehaka, Sesus harere humo batu hĩ niy iwatahi ibetsakak. Sesus tuktsa inazuzukbanahaze ibetsakak. Ipe icy:

— Tsiwabytoktokta! Ikia Sudeu tsimy. Hawa skaraba Sudeutsabyitsa sopyk ty mykara atsatu asopyk tsimy. Sudeutsa wata batu tsimykara. Iwatahi myzubaha Sudeutsa watsa sisopyk mozihikik. Ana kino batu imysapy my. Asopyksapy byihuja — icy.

Sudeutsa, Sudeutsabyitsa niwatihi Sesus harere bo hyĩ mykaranaha asahi zuba Deus bo mysioktyhyryk hĩ.

¹⁵ Kyze katsakta Sudeutsa tsimaha. Myzotsa Sudeutsa niaha. Utsa kytsa simysapybyitsa nikaranaha iwa Sëtios mekywatsa soho nisinaropykyknaha. ¹⁶ Iwatsa tu katsa Moises harere ibyky bo zuba yhĩ tsimykaranahaze. Deus batu mytyso:

— O asakta simysapyrëtsa maha — iwa batu tyso. Katsa Sesus Kiristu harere bo zuba hyĩ tsimykaranahaze Deus mysoho tihi:

— O asakta simysapyrëtsa maha — my.

Katsa Sesus harere bo yhĩ tsimykaranaha humo Deus okzeka mymysapyrëtsa tsimoziknaha. Batu aty tohi Moises harere ibyky bo yhĩ my zeka tsimysapyrëta mozik. Deus tatuk hi mymyoktyhyryk iwatsahi mysapyrëtsa tsimaha. Moises harere ibyky bo hyĩ tsimykaranaha zeka Deus okzeka batu mysapy tsimaha, ana humo kino

batu Deus bo mymyoktyhyryk. ¹⁷ Deus tatuk mymyoktyhyryk iwatsahi Moises harere ibyky tsimoewynaha. Sesus Kiristu harere bo zuba yhÿ tsimykaranaha. Iwaze aparakbaha mype:

— O ikiahatsa Sudeutsabyitsa watsa tsimoziknaha. Ahamysapybyitsa tsimykaranaha — mybarapetu mykaranaha. Iwa zeka Sesus Kiristu humo ahamysapybyitsa tsimykaranaha. Batu ba. Sesus Kiristu humo batu tymyi. ¹⁸ Kapetu kasopyk zeka:

— O Moises harere ibyky humo yhÿ mykarazo iwaze kasapybyita mykara zeka mohokda — my. Utatu pikspihikbataka. Iwa mytsaty mykara zeka iwatahi Moises harere ibyky batu hÿ mykara. Sizubarëtsa kasoho tihi:

— O atakta batu imysapy my — mykaranaha. ¹⁹ Moises harere humo inymyrytohi iwa zeka iharere bo batu hÿ mykara. Iwatahi batu kasapy mozik iharere bo yhÿ mykara. Iwatahi Moises harere ibyky zimoewy. Abaka Kiristu harere bo zuba hyÿ mykara isopyk mykara. Kiristu kasapyzeken iharapatawyhyta humo nihyrikosokda. Kasapyzeken nihyrikosokdaze kasopykwy nepykba, abaka ituk mynapykyryk ihumo zuba kamysapyrëta mozik.

²⁰ Utakta Sesus zuba mozihikik mykara, atahi kasapyzeken nihyrikosokda iwatahi kahumo izihik bara ty ka pimoewy mykara. Kiristu hyrikoso katuk mynapykyryk ihumo zuba mozuruku, iwatahi abaka kasopykwy pimoewy. Abaka Deus tse humo kaspirikporëta. Atahi namykse nikara ana humo hi utakta batu kawahi zikara. Sesus kapokzi tsimypokzitsiarëta iwatahi ituk mynapykyryk. ²¹ Deus mymysapywyky ana humo hi Kiristu mysapyzeken nihyrikosokda. Iwatahi kakurëta. Deus mype my zeka:

— O ikiahatsa ahamysapyrëtsa Moises harere ibyky humo tsimykaranaha — Iwa batu tyso. Iwa niy zeka hawa

hāta sa Kiristu nihyrikosokda. Nawa batu ba. Kiristu harere bo hȳy ikykara ihumo zuba kaspirikporēta iwaze Deus tihi:

— Ikia tsamysapyrēta. Kiristu katse asapyzeyky nihyrikosokda ana humo hi tsamysapyrēta — my.

3

Ikiahatsa Moises Deus harere ibyky naha bo ja yh̄y tsimaha. Deus wasania ty bo ja yh̄y tsimaha. Na waha sa tsimyzihikiknaha.

¹ — O Karatas ezektsa ahakedepyktsa zuba. Aty sa zahaspihikbataka. Ahape mybarapetu nikaranaha. Hawa kytsa Sesus Kiristu iharapatawyhyta humo zihyrikiknaha iwa zibezenaha, ana kino botu ahabo iktsaso. ² Ahabo motsaso zeka my:

“Hawa sa Deus hyrikoso ahatuk mynapykyryk. Iki-ahatsa Moises harere ibyky bo yh̄y tsikykarannahatsa ja Deus hyrikoso ahatuk napykyryk my. Iki-ahatsa tihi:

‘Batu ba.’ Katsaktsa Sesus Kiristu harere bo hȳy tsikykarannahaze iharere humo myspirikporētsa, ana humo hi Deus hyrikoso mytuk mynapykyryk” — tsimaha.

³ — O ikiahatsa ahakedepyktsa. Sesus harere bo hȳy tsikykarannahaze Deus hyrikoso ahatuk mynapykyryk. Abaka Deus hyrikoso tsiperek tsihikiknaha. Iwatsahi ahape tu tsimykaranaha: “Abaka myhumo zuba tsimyzurukunaha tsimaha” — my. Batu wasani my. ⁴ Hawa ahabo nikara ana bo hi batu mytsaty tsimykaranaha Deus hyrikoso ahatuk mynapykyryk iwatsahi ihumo arek arek byitaha! ⁵ Deus hi tahyrikoso ahabo zipaha iwatahi ahatuk mynapykyryk. Ihyrikoso humo hawaha kytsa batu zikaha atahi ahatuk ziknakara. Iwa humo nikara. Sesus harere bo hȳy tsikykarannahaze ahatuk nikara. Iwa h̄y. Moises

harere ibyky bo yhỹ tsikykaranaha zeka Deus hyrikoso batu ahatur mynapykyryk.

⁶ Aba Abarão soho bo mytsaty tahaktsa! Deus papeu humo isoho botu ziwataha:

— O atakta Deus humo tispirikporêta iwaze Deus tihi: “O Abarão kaharere bo hỹ nikara kahumo tispirikporêta tsimysapyrêta niyzik. Isapybyikia ty nikara nisiokzohik ikspiritsokdatawy” — niy. Iwa Deus papeu humo botu ziwatahaka niy.

⁷ Iwatsahi asaktsa Sesus harere bo hỹ mykaranaha iwatsahi Abarão watsa maha. Sispirikporêtsa Abarão tsekokatsa babatsa maha sisoho humo tsimaha. ⁸ Tubabatu taparaktsa botu Deus papeu humo ziwatahaba Sudeutsabyitsa soho botu ziwatahakanaha. Asaktsa Deus harere bo hỹ mykaranaha iwatsahi ihumo sispirikporêtsa maha. Iwaze Deus tihi:

— O asaktsa Sudeutsabyitsa kahumo sispirikporêtsa iwaze ispe: “O ikiahatsa ahamysapyrêtsa tsimoziknaha” — my.

Iwa Deus papeu humo taparaktsa botu ziwatahakanaha. Hawa Deus wasania ty Abarão bo nitsasoko aibani zuba atsatu mykara. Iwaze nawa ha ty botu nitsasoko atsatu wasani my ana kino aparakbaha ziwatahakanaha. Deus tihi:

— O Abarão ikia kahumo tsaspirikporêta iwaze mybarawy sizubarêtsa ahumo mysisapywyky. Myzubaha nanabyitaba ahumo mysisapywyky — niy.

Iwa taparaktsa Deus papeu humo ziwatahakanaha. ⁹ Iwatahi Abarão Deus harere bo hỹ nikara iwatahi ihumo tispirikporêta iwaze Deus zisapywyky. Aty Deus harere bo hỹ mykara ihumo mospirikpo zeka ibo pisapywyky. Abarão wata nikara. Iwa myhỹ.

¹⁰ Iwaze aty zeka:

— O utakta Moises harere ibyky bo yhỹ my zeka iwaze kamysapyrēta mozik — my. Mytsaty ahabyita mykara atakta Deus isoho tihi:

— Atakta batu isapy my — my. Taparaktsa Deus papeu humo ziwatahakanahaze:

— Aty zeka Moises harere bo yhỹ mykara iwaze iharere bo estuba zuba batu hỹ my iwaze Deus ipe my: “Ikia batu amysapy” my — iwa Deus ziwatahaka. ¹¹ Taparaktsa Deus papeu humo ziwatahakanaha:

— Ata zuba Deus harere bo hyỹ mykara ihumo mospirikpoko ata soho Deus hi “O wasani tsimozik” my iwa ziwatahakanaha. Batu aty tohi Moises harere ibyky tsizubarēna humo hyỹ mykara, anatyhi batu zikaha. Ana humo kino myhyrinyrētsa. ¹² Aty zeka estuba Moises harere ibyky bo hyỹ my zeka batu atsa botu Deus harere bo hyỹ mykara, atakta ihumo batu ispirikpo. Aty Deus humo tispirikporēta tu meky watu niyzik. Aty Moises harere ibyky bo yhỹ mykara atahi iharere bo zuba mykara hỹ. Aty Deus harere bo yhỹ mykara iharere humo mospirikpoko — my. Ana kino meky watu mozik. Iwa my.

¹³ Tubabatu Deus papeu humo:

— Aty kytsa iharapatawyhyta humo pibezena atakta tamysapybyizikyty zibezena. Iwatsahi pibezena zeka wasani my — iwa ziwatahakanaha. Katsa niwatihi. Mysapybyitsa tsikykarana Kiristu hi mysapyzky nihyrikosokda. ¹⁴ Atahi kytsa iharapatawyhyta humo zihyriziknaha iwatahi mysapyzky nihyrikosokda. Nihyrikosokdaze mysapybyikitsa tsikykarana ihumo Deus mymyokzohik. Deus hi:

— Ikiahatsa kaokzeka tsahamysapyrētsa — my. Tubabatu Abarão Deus harere bo hyỹ ziknakara ihumo nispirikpokoze Deus isoho tihi:

— O ikia tsamysapyrêta — niy. Katsaktsa Abarão watsa tsimaha. Deus harere bo hyĩ tsimykaranaha ihumo tsimyspirikponaha iwaze Deus hyrikoso mytuk mynapykyryk. Iwahatu kytsa Sudeutsabyitsa iharere bo hyĩ mykaranaha zeka ihumo sispirikporêtsa moziknaha. Deus hyrikoso sibo zipaha, ihyrikoso situk mynapykyryk. Iwa myhỹ.

Moises Deus harere taparaky nitsasoko. Hawa Deus harere ty wasani mykara.

¹⁵ — O katukytsa hawa tsimyzurukunaha humo motsasoko. Kytsa petoktsa astsatu mozihikiknaha anasoho papeu humo piwatahakanaha. Zikspiriktsokdanaha bara ty hi petoktsa naro ziwatahakanaha. Iwaze batu aty tohi papeu humo ba zimyi. Estuba zikino batu arek ziky. Utsa harere papeu humo piwatahaka batu ziky. Hawa ziwatahakanaha anaty zuba mykaranaha.

¹⁶ Iwata tubabatu Deus Abarão bo nitsasoko. “O ikia pasapywyky. Estuba zubata atsekoka iknykta ibo pisapywyky” nikara. Deus watahaha ty batu tyso atsekokatsa sizubarêtsa bo mysisapywyky iwatahaha tihi estuba zuba atsekoka iknykta ibo pisapywyky — niy. Abaka Kiristu soho humo myhyrinymyrêtsa hỹ.

¹⁷ Nawa ha ty motsasoko pahahyrinymyry. Tubabatu Deus Abarão bo nitsasoko. Ipe niy:

— O ikia pasapywyky. Kaharere humo yhỹ tsimy hỹ — niy. Iwaze kwatero sêtos terĩta niytyk tseheze Deus Moises bo iharere nitsasoko. Nawa ha ty Deus Abarão pe wasani my. Nawa ha ty Deus Moises pe wasani my. Petoktsa hatsa bo nitsasoko. Tapara Deus Abarão pe niy:

— O ikia pasapywyky — niy. Iwaze usta harere Moises bo nitsasoko taparaky harere batu meky watu ana kino tapara tu ituk nitsasoko.

¹⁸ Iwatsahi hawa Deus mymysapywy tsihikik iharere humo zuba hyĩ tsimykaranaha. Katsa Moises harere ibyky bo yhyĩ tsimaha zeka Deus isapyrēnikia ty batu mybo nyny my. Deus isapyrēnikia ty Abarão bo nyny niy. Amy humo niy. Iharere humo ipe niy iwatahi isapyrēnikia ty ibo nyny niyhy.

¹⁹ Iwaze kytsa mytsaty mykaranaha. Amo skaraba Moises harere ibyky nitsasoko. Moises harere puētsik ana hi Deus botu Abarão pe niy nimyhyrinymyryky, mysapybyitsa tsikykaranaha nimywatawyky. Abarão tsekoka Kiristu batu isukmo taziwazy iwaze Moises harere nitsasoko ana bo hi yhyĩ tsimykaranaha. Kiristu izumuze Moises sopyk tsmoewynaha. Deus bijoikpe iknyktsa inasipeha iharere nitsasoko Moises bo niaha. Inasiknahaze nitsasokonaha maku estuba zubata bo niaha. Iwaze zikiehe atakta Moises myzubaha bo atsawatu nitsasoko. ²⁰ Deus Abarão pe niy ibo zuba nitsasoko. Bijoikpe iknyktsa bo batu tyso. Utsa kytsa bo batu tyso. Abarão bo zuba nitsasoko hỹ.

Amy sa Moises Deus harere taparaky nitsaso wasani niy.

²¹ Kyze kytsa tahapetu sisopyk:

— O Moises Deus iwatahaka zika Deus harere meky watu ja. Katsa Deus tuk mywahi tsinapykyryknaha Moises watahaha humo ja ana humo hi tsimykaranaha — maha. Batu ba. Moises watahaha bo hyĩ tsimahaze batu mysapy tsimoziknaha. Iwa hỹ. ²² Deus watahaha tihi:

— Aparakbaha mybarawy ezektsa imysapybara katsa mytuk. Asaktsa Deus humo sispirikporētsa amy ty Deus botu nitsaso isapyrēnikia ty sibo nyny mynakara — niy.

²³ Tapara Moises harere ibyky bo yhyĩ nikaranaha. Sihurukutsa watsa asahi ba zikwaknaha isopykwy batu zikaha. Bykyze Sesus harere bo hyĩ mykaranaha iwaze ihumo

sispirikporêtsa moziknaha. ²⁴ Iwatahi Moises harere ibyky myhyrinomyrytsa wata my. Nawa ha ty batu isapy nimyhyrinomyry. Isopykwy humo kino mysapybyitsa tsikykaranaha nimyhyrinomyryky iwaze Kiristu izumuze katsaktsa iharere bo hyĩ tsimykaranaha ihumo myspirikporêtsa tsimoziknaha ana humo hi mymysapyrêtsa tsimoziknaha. ²⁵ Abaka Kiristu harere bo hyĩ tsimykaranaha ihumo myspirikporêtsa Deus okzeka mymysapyrêtsa iwatsahi Moises harere ibyky tsmoewynaha.

²⁶ Ikiahatsa Kiristu Sesus harere bo zuba hyĩ tsimykaranaha iwatsahi ihumo ahaspirikporêtsa iwatsahi Deus hyrytsa tsimoziknaha. ²⁷ Sesus humo ahaspirikporêtsa kytsa zahaharasuhiknaha niaha. Ikiahatsa Kiristu watsa puêtsik tsimyzihikiknaha. ²⁸ Iwatsahi myzubarêtsa Sesus tuktsa maha, Deus okzeka Sudeutsa Sudeutsabyitsa watsa my. Kytsa tarabaja batu okyrysaro humo sinamyrêtsa watsa my. Maku kino wytykyryk wahaza my. Deus okzeka atsaesubaha maha. Sesus Kiristu humo sispirikporêtsa Deus okzeka atsabarêtsa maha. ²⁹ Iwatsahi Kiristu harere bo hyĩ tsimykaranaha ihumo myspirikporêtsa katsa Abarão tsekokatsa watsa. Katsaktsa Abarão sapyzekenya tsimaha iwaze Deus isapyrênikia ty ibo nitsasoko. Abaka atahi mybo nyny mykara.

4

¹ Makuskyry iykpykbyize batu ihyrinomyry. Batu inamyky. Puêtsik pyk myze taypykze iwaze tisokpykziurêta. Tsinamyrêta. Iykpyk byizeka maku tarabaja batu okyrysaro wata, tahawatu zipehkanaha. Utsa kytsa harere bo yhy mynakara. ² Mytaypykze ihyrinomyrytsa zihyrynomyrykynaha. Amakata inamy perykytsa. Asaktsa ihumo simypokzitsiukrêtsa. Iwa isopyk. Kyze izo tihi:

— Aba katse itaypyk niy abaka batu zipokzitsinaha — niy.

³ Iwata katsa deustsabyitsa harere humo yh̄y tsikykaranaha. Sipokso mypybyr̄etsa. Kyze Deus harere ty humo tsiwabyziunaha. ⁴ Kyze nawa zuruze Deus botu ziwatawy Deus tatse mybarawy eze ktsa bo zipegahik. Atahi mybarawy eze nipuruk mywata niyzik. Mybarawy eze ktsa ije niyzik. Taypykykze Moises harere ibyky bo yh̄y ziknakara. ⁵ Iwaze myzubaha bo Deus bo mymyoktyhyryk. Katsaktsa Moises harere ibyky bo yh̄y tsimyzihikiknaha katsa kino mymyoktyhyryk. Mysapyzeken nihyrikosokda iwatahi mysapybyitsa tsikykaranaha Deus nimyokzohik iwatsahi ihyrytsa tsikyziknaha.

⁶ Iwaze Deus tse Sesus tazo hyrikoso mybo zipaha, mytuk tawahi mynapykyryk. Ata humo zuba katsa Deus bo mopamykysoikik:

— O myzo ikia humo ka mymypo kzsitar̄eta — tsimaha.

⁷ Iwa Deus niy. Tapara ikiahatsa nawaha ty batu isapy tsikykaranaha. Ahasopyksapyhu ja. Abaka Deus hyrytsa tsimoziknaha, ihyrytsa tuze isapyr̄enikia ty botu nitsaso ahabo nyny my.

Pauro Karatas eze ktsa humo paikpa mytsaty ziknakara.

⁸ Tubabatu Deus harere bo batu h̄y tsikykaranaha ahaspirikpobyitsa tsikykaranaha iwaze deustsabyitsa hyrikoso sapybara harere bo zuba yh̄y tsikykaranaha. ⁹ Abaka meky watu. Deus humo ahahyrinymyr̄etsa. Deus hiba zahany, iwatuze hawa skaraba deustsabyitsa harere bo yh̄y tsimykaranahazo. Siharere humo ahabyitsa tu ana humo hi tsimyzihikikzonaha.

¹⁰ Ikiahatsa hawaze ja, byzoje pirahanahaze niytyk tseheze iwa ana soho ty pykyhytu tsiwabytoktonaha.

¹¹ Hawa tsimykaranaha paikpa mytsaty tsimykaranaha. Iwaze kapetu kasopyk:

— Nawa ha ty Sesus harere iksihyrinymyryky batu ja — mykara.

¹² — O katukytsa! Ahabo myzapykyky. Tubabatu Moises harere ty pykyhytu yhÿ ikykara. Kyze meky watu ikyzik. Ahawatu ikyzik. Abaka ikiahatsa Moises harere bo yhÿ tsimyzihikikzonaha iwatsahi Deus okzeka ahamysapyrÿtsa tsimoziknaha mytsaty ahabyitsa tsimykaranaha. Tsipimyikinaha zeka ba kahumo zikaha — my. ¹³ Ahaspiriktsokda byihuja tapara ahabo iknakozoreze kamyitsapyrÿta ikykara iwatatu Deus harere ahabo iktsasoko. ¹⁴ Kamyitsapyre tuze kapokso batu ahasikpyby. Kaharere humo tsiwabytoktonaha. Bijoikpe iknykta Deus tsumuÿhÿtsa Sesus Kiristu watihî ahabo my zeka ja hawa siharere tsipiwabynaha iwa kaharere tsiwabykynaha. Kahumo ka tsamyharerewabyrÿtsa hÿ. ¹⁵ Ahakurÿtsa tsikaha. Kahumo tsimypokzitsirÿtsa hÿ. Ahahyriktsa kabo tsiksibobokyzykynaha. Hawa ha ty ahabo ipokzitsia ty kabo tsinyny tsihikiknaha. ¹⁶ Utakta Deus harere baba humo ahabo iktsaso ana humo hi ja ahakuriukrÿtsa tsimykaranaha.

¹⁷ Asaktsa Deus soho ty mybarapetu mykaranaha siharere baba zuba tsiwabyziukunaha. Ahahumo sizokdirÿtsa. Ahaokzeka wasanitsa watsa mynapykyryknaha iwa zeka kaharere bo batu hÿ tsimaha, ana hi mozihikiknaha. Iwaze siharere bo zuba yhÿ tsimykaranaha mytsaty mykaranaha. ¹⁸ Aparakbaha ahaokzeka simysapyrÿtsa mahaze pahasapywykynaha zeka wasani myhÿ. Ahatukbyitsa tuze pahasapywykynaha zeka wasani my.

¹⁹ — O katukytsa ahahumo kamypokzitsiarÿta. Utakta wytyk wata. Atywatatsa tabykyhy pepurukze tsimy-

itsapyrētatsa! Ikiahatsa Kiristu harere tsikaeni zuba ahahyrinymyrētsa iwatahi ahatsyhyryze sinini mykara. Hawa wytyk ibykyhy humo tsimyitsapyrētatsa wata ahatsyhyryze sinini mykara. Ikiahatsa Sesus tuktsa babatsa tsimoziknaha ana humo hi ahatsyhyryze sinini mykara. ²⁰ O katukytsa ahahumo kahyrikbarēta. Ahabo tsimypamykyso tsihikiknaha. Batu zik utakta nokponi mynapykyryk. Kaharere humo pahatsumuēhĩ tsihikik. Ahasoho bo paikpa mytsaty mykara — my.

Deus harere wytykyryk petokorok waza my. Sara Aka niwatihi.

²¹ Aty zeka:

— Utakta Moises harere ibyky bo yhỹ mozihikik iwatahi Deus okzeka kamysapyrēta mozik — my. Ikiape my:

— O Moises harere ibyky tsiwabyziuku — my. ²² Tubabatu Abarão hyrytsa petoktsa niy. Taparaktatsa tsumuēhĩtsa Aka inarokotatsa atatsa humo estuba zuba nihyrytsa iwaze itse nipuruk. Bykyze ioke babatatsa Sara inarokotatsa humo niwatihi estuba zuba nihyrytsa iwaze itse nipuruk. ²³ Iwaze itse taparakta ije sitsumuēhĩtsa niy. Atahi nipurukze siza siza byiki hyrytsa wa tihi niy. Usta itse iykpykyhyzytykta batu. Deus harere hi nitsaso atsatu wasani niy. Abarão Sara ahatsa nipuruk sitsaikbatsa tu Deus harere humo zuba itse iykpykyhyzytykta.

²⁴⁻²⁵ Iwa piwataha iwaze pahahyrinymyry. Wytykyryk petokokzahaza Deus harere petok zuba waha. Tapara Deus harere Moises bo nitsasoko atahi Deus tyryktsa bo nitsasoko. Anaharere wytyk sitsumuēhĩtsa watatsa my. Bykyze Deus harere Sesus soho nitsasoko asahi ihumo sispirikporētsa Deus tyryktsa moziknaha. Usa harere wytyk ioke babatatsa watatsa my. Asiza harere wytykyryk petokokzahaza soho humo pahatsumuēhĩ.

Moises iwatahaha soho ty mykara. Anaka hara bijobonita ikny inasikze anaharere aparakbaha bo nitsaso. Aparakbaha Sudeutsa hara bijobonikiha Sinija inarokoha mykaranaha. Aparakbaha Arabija ezektsa ana hara bijoboniki ha Aka inarokoha mykaranaha. Ana hara bijobonikiha atatsa watatsa atatsa katsa sitsumuẽhĩtsa niy my. Iwatatsahi itsekokatsa batu ziksibetesanaha. Serusarẽhe soho bo mytsaty ziknakaranaha. Asahi Moises harere ibyky humo zuba hyỹ mykaranaha. Asaktsa Sesus Kiristu harere bo batu hỹ zikaha. Iwatsahi asahi Moises iwatahaha bo zuba hyỹ mykaranaha sitsumuẽhĩtsa tsekokatsa watsa maha.

²⁶ Katsaktsa Deus harere bo hyỹ tsimykaranaha iwaze ihumo myspirikporẽtsa tsimoziknaha. Iwatsahi Deus okzeka mysapyrẽtsa tsimoziknaha Serusarẽhe myjewa. Usa Serusarẽhe ezytyk bijoikpe ikny mynasik anahi myjewa. Atatsa itsekokatsa Moises iwatahaha soho tsikaeni zuba mytsaty mykaranaha. Sesus harere bo zuba hyỹ mynakaranaha. ²⁷ Deus watahaha botu hi:

— O wytykyryk ikiahaka ahabykyhybyiza ahakurẽza!

Ikiahaka ahabykyhybyiza hi ba itsapyriziyyk ahakurẽza!

Ikiahaka ahahyrytsa tsimysiubaranaha.

Ipytsakatatsa ihyrytsa sizubarẽtsa ikiahaka ahapy-itsabyiza waza tsimoziknaha,

asiza hi simyiwyyhyza iwazatu ikiahaka ahhyrytsa tsimysiubaranaha.

Iwa Deus watahaha botu nitsasoko.

²⁸ Iwatahi katukytsa Deus hyrytsa tsimoziknaha. Sesus harere bo hyỹ tsimykaranaha iwatsahi ihumo ahaspirikporẽtsa iwatsahi Deus hyrytsa tsimoziknaha. Tubabatu Isake Abarão tse nipuruk, Deus harere humo zuba nipuruk. Abarão tse babata. Atsawatu ikiahatsa Deus hyrytsa

tsimoziknaha. Sesus harere bo zuba hyÿ tsimykaranaha iwatsahi ahaspirikporëtsa tsimoziknaha. Ahaspirikporëtsa ziky Deus hyrytsa tsimoziknaha.

²⁹ Tubabatu Aka sitsumuëhÿtsa tse Abarão ioke babatatsa Sara tse nizukyryky. Abaka atsatu mykaranaha. Asaktsa Moises harere bo hyÿ mykaranaha asahi Sesus tuktsa mysisukyrikiknaha. Aparakbaha Sesus harere bo hyÿ mykaranaha Deus hyrikoso situk mynapykyryk asa hi mysisukyrykynaha. ³⁰ Deus watahaha hi:

— Sitsumuëhÿtsa tse humo kino mysiksiwyhik! Abarão oke babatatsa tse zuba tazo namy ty nyny mykara — iwa taparaktsa ziwatahakanaha.

³¹ Iwaze katukytsa katsa batu tsumuëhÿtsa tsekokatsa watsa tsimaha. Moises harere ibyky humo ka ba hÿ zikaha. Katsaktsa ioke babatatsa tse watsa tsimaha. Sesus harere bo hyÿ tsimykaranaha iwaze ihumo myspirikporëtsa iwatsahi Deus hyrytsa babatsa tsimoziknaha.

5

Aty sopyk humo sa tsimaha.

¹ Kiristu humo mysapyrëtsa iwaze taparaktsa harere bo batu mysopyk. Iwaze Moises harere bo zuba batu mytsatyziu tsimaha. Kiristu mymybetesaka zeka ituk mywahi tsimyzurukunaktsa! Kiristu zikwy mytuk mynapykyryk iwatsahi hawa tsimyzurukunaha wasani tsimykaranaha. Iwa tsimypykyryknahaze ustsaktsa kytsa ahabo motsasonaha zeka:

— O taparaktsa sopykwy ty tsimaha iwatsahi Deus okzeka ahamysapyrëtsa tsimoziknaha. Siharere bo yhÿ tsimaha! — mybarapetu mykaranaha. Siharere bo batu waby zikaha. Sitsumuëhÿtsitsa watsa batu tsimozikzonaha!

² Wabyziutaha! Uta Pauro ahape my:

— Ahanury ty myzyk myzyk byitahaktsa iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha. Kytsa iwa maha zeka Kiristu ahasapyzky nihyrikosokdaze batu mysapy. Batu zahatsumuëhĩ. ³ Kaharere ty ahape myzo: “Aty zeka Moises harere ibyky humo tanury ty pizyzykik atakta Moises harere ibyky tsizubarëna bo hyÿ mykara. Batu estuba harere zuba, tsizubarëna mykara ziky”.

⁴ Ikiatsa Moises harere ibyky bo hyÿ tsimaha zeka iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha, iwaze Kiristu metutu tsimypykyryknaha. Hawa tsimykaranaha humo batu pahasapywy batu ziky. Ikiatsa tsipahanury zyzykiknaha zeka Deus okzeka batu ahamysapy Deus ba zahasapywyky.

⁵ Katsaktsa Deus okzeka mysapyrëtsa Sesus harere bo hyÿ tsimykaranaha ihumo myspihikrëtsa. Deus hyrikoso mytuk mynapykyryk ana hi taperyky. Myakubyrisorokrëtsa tuze iwaze Deus mype tihi: “O ikiatsa ahamysapyrëtsa Sesus humo ahaspihikrëtsa iharere bo hyÿ tsimykaranaha” — mykara.

Ana harere hi tsipiperykynaha hÿ. Myspirikporëtsa tu Deus zikwy humo anaharere hi ihyrikoso humo taperyky. ⁶ Iwatsahi Sesus Kiristu harere bo zuba hyÿ tsimykaranaha. Aty taty piak zyk zeka, usta taty piak zyk byizeka astsatu maha. Deus okzeka petoktsa harapewatu maha. Katsaktsa Sesus Kiristu harere bo hyÿ tsimykaranaha ihumo myspirikporëtsa tsimoziknaha iwatsahi tyharape pokzitsikinaha iwaze Deus mymysapywyky.

⁷ Tapara ikiatsa Sesus harere bo hyÿ tsimykaranaha iwaze ihumo tsisapybakanaha. Amo skaraba Sesus harere

humo batu ahakparawy. Mektsa harere zuba tsiwabyz-iukunaha iwatsahi tsimyikiknaha. Sesus harere bo hȳzo tahaktsa. ⁸ Deus zahawatawy iwatahi mektsa harere ty ka batu ahabo tyso. ⁹ Ana kino atsikara pytowy waha. Hawa katsaktsa pytowy tsikaeni zuba tiriko tuk ikykywy bykyze nawerekbaik. Pytowy na waha estuba zubata mektsa harere bo yh̄ my zeka ustsya mysimiywybaka. ¹⁰ Utakta ikiahatsa humo kahyrinymyr̄eta h̄y. Katsaktsa Sesus harere bo hȳ tsimykaranaha iwatsahi ihumo mysyrikpor̄etsa kawata mytsaty tsimykaranaha. Hawa mytsaty tsimykaranaha kawatsa atsatu mytsaty tsimykaranaha. Atakta imysapybara ty zahahyrinymyryky iwatahi zahamyiwyky sinini mykara. Deus hi ipe my:

— O ikia batu amysapy tsimy, hawa batu sapy kahyrytsa nisihyrinymyry — my.

Iwa Deus isoho humo mykara.

¹¹ — O katukytsa kahumo mytsatyziutahaktsa! Amo skaraba kytsa ziksukyrykynaha. Ahabo zeka ahanury ty tysizyzyknahaktsa iwatsahi Deus okzeka ahamysapyr̄etsa tsimoziknaha mykara iwa zeka ba zik sukyrykynaha. Iwa batu tyso. Kaharere Kiristu soho ikykara ihumo ahaspyrikpor̄etsa iwatsahi Deus okzeka ahamysapyr̄etsa tsimoziknaha anahumo hi tahakyrikinaha. Hawa Sesus Kiristu ahasapyzky iharapatawyhyta humo zihyryzikiknaha, iwaze zibezena, anahumo hi katsa Deus okzeka mysapyr̄etsa anaharere humo hi tahakyrytyikiknaha. ¹² Asaktsa ahape ahanury tsizyzyknahaktsa iwatsahi Deus okzeka ahamysapyr̄etsa tsimoziknaha. Asaktsa sokorot-sapu siakparawy, asaktsa tahapiakzyzykbaiknaha iwatsahi tahamyitsapyrikiknaha ana humo kino mozihikik — my.

¹³ — O katukytsa Deus humo ahamysapyr̄etsa. Iwatsahi ahaspyrikpor̄etsa tuze batu tyso. “O abaka hawa katsa

tsimyzihikiknaha atsatu tsimykaranaha. Mysapybyit-satu tsimykaranaha” — Iwa batu tyso. Ahaspirikporētsa tyharape pokzitsikinahaktsa! ¹⁴ Moises harere ibyky taparaktsa mydiritsa kino niwatihi sisopykwy tu maha. Siwatahaha tihi:

— Aotutsa pauktsitsa humo tynasipokzitsikinaha, ahumo tu tsinakaranaha wa tihi tysipokzitsiki — niy. ¹⁵ Katukytsa pykyhytutaha! Siraratsa sirerētsa watsa asahi nahapeboroikiknaha iwa ahasopyk zeka hawatsa tsimykaranaha ustsā ba ziksipokzi tsihikik. Ikiahatsa ahaharerewabymybarētsa iwatsahi ustsā ba mysipokzitsi iwaze siraratsa watsa ahasopyk.

Deus hyrikoso mytuk mynapykyrykze mysapyrētsa tsi-moziknaha.

¹⁶ Kaharere bo wabyziutaha! Deus hyrikoso ahatuk mynapykyryk zeka iharere bo zuba hȳ tsimykaranaha. Iharere tawaby zeka ana hi Deus mozihikik. Hawaha tsimyzihikiknaha bo ka mytsaty mytsaty byitaha. ¹⁷ Hawa katsa tsimyzihikiknaha Deus hyrikoso batu h̄y niy. Hawa Deus hyrikoso mozihikik anatyhi katsa batu h̄y tsikaha. Deus hyrikoso harere bo zuba yh̄y tsimykaranaha zeka hawa tsimyzihikiknaha batu zikaha. ¹⁸ Deus hyrikoso harere bo hȳ tsimykaranaha zeka Moises harere ibyky tsizubarēna bo batu mytsaty tsimykaranaha. Anaharere humo hi tsimykaranaha zeka Deus okzeka batu mysapy iwatsahi Moises harere ibyky bo batu h̄y ahasopyk.

¹⁹ Hawa katsa tsimykaranaha ana humo hi mysoho baba tsi-piwatawynaha iwatsahi aparakbaha myhumo si-hyrinymyrētsa. Iwa tsimykaranaha. Asaktsa Deus harere bo batu h̄y zikaha iwa mozurukunaha. Asaktsa usta oke bo hua mynakaranaha. Usta maku piwohiknaha. Kytsa wytykyryk mysipyryyikiknaha mowakryriwy waza

sisopyk. ²⁰⁻²¹ Kytsa deustsabyitsa bo napamykysoikiknaha. Asaktsa tahanamy zuba motsasoko:

— O atakta mydeus hi — mybarapetu mykaranaha. Utsa kytsa namysukyrykynaha. Sisukyrytsitsa tu naharape huzeduikiknaha. Siokanirëtsa simyiwyyhytsa tu mynasisuknikinaha. Sizokdirëtsa. Sihyrikzorëtsa. Myharapepehaikiknaha iwatsahi metutu mopapahabakanaha. Mysiaknikinaha. Tsõš humo pypykbeze mykaranaha. Utsa humo myharape huzezukunaha. Asaktsa iwa sisopyk batu Deus tyryktsa zikyriknaha. Deus harere humo batu siakparawy.

²²⁻²³ Deus hyrikoso mynamykse zeka mytuk mynapykyryk ihumo meky watu tsimoziknaha. Deus hyrikoso humo ustsapaarakbaha bo tyharape pokzitsikinaha. Atahi mymykusukniwyky iwatsahi mykurëtsa tsimykaranaha. Ihumo batu paikpa mytsaty tsimykaranaha. Mysopykziurëtsa. Mykubyrisorokrëtsa. Aparakbaha tuk ba ziksimyiki myhyrikporëtsa mysapyrëtsa tsimaha. Mysakikihikrëtsa. Batu tyso katsa zubatsa ty wasani tsimykaranaha. Mypetu mysopyk iwatsahi mysapybara ty batu hÿ tsimaha. Deus mysoho tihi:

— O ahamysapyrëtsa tsimoziknaha — my. Mysapyrëtsa tu zeka batu aty tohi mype ziky:

— O batu ahamysapy — maha. Iwa batu tyso zikaha. ²⁴ Katsaktsa Sesus tuktsa tsimaha. Ihumo myspirikporëtsa hawa ha ty tsimyzihihikiknaha ana kino batu myty peha my. Hawa batu mysapy ana humo kino batu hÿ tsimaha. ²⁵ Deus hyrikoso mytuk mynapykyryk zeka ata humo kino meky watu tsimoziknaha. Atahi mypehatsa mozik. Iwatsahi izikwy humo tsimyzurukunaha. Atazuba namypehaka iwatsahi iharere bo zuba ma tynakarana-

haktsa! Hawa mymykzoze iwa tsimyzurukunaha. ²⁶ Batu tyso:

— O katsa zuba wasani tsimaha. Iwa batu tyso. Aparakbaha tuk ahasakpare byihujataha! Utsa aparakbaha simysapyrëtsa humo maha zeka ahazokdi byihujataha! kytsa — my.

6

Tyharape tsumuëhĩnahaktsa.

¹ — O katukytsa aty zeka imysapybyikia ty my zeka ikiahatsaktsa Deus hyrikoso myzahakse ibo tsitsumuëhĩnaha — ipe tsimaha:

— O katsy amysapybyikia ty tsikapybywykta! — tsimaha. Ahaharereziu tuktu ja taha! Pykyhytutaha. Atsawatu tsimyzihikiknaha zeka ahamysapybyitsa tsimykaranaha. ² Aty zeka iakubyikita bo iktsa tsimaha zeka ibo tsakusuknikinaha. Tyhapetsumuëhĩnahaktsa kytsa! Iwaze anaharere humo Kiristu zahahyrinymyryky hyĩ tsimykaranaha. ³ Aty tapetu isopyk zeka:

— O utakta abazubata — mytsaty ahabyita mykara, myhyrizikwybyita tu tapetu isopyk mybarapetu mykara. ⁴ Hawa tsimykara ana soho bohi mytsatyziu tsimykara. Tsipisapyky zeka tsakurëtakta! Apetu asopyk. — Wasani mykara iwatahi kakurëta — my. Hawa utsa mykaranaha sibo batu iktsa tsimy. Batu tyso:

— Utsaktsa batu wasani mykaranaha iwatahi utakta wasani mynakara — my. Iwa batu tyso. ⁵ Ahazikara byihuja kytsa! Ahahyriziktsokzawy humo Deus ahabo nyny niy iwatsahi tsikahasopykziubanahaktsa!

⁶ Aty Deus harere ty pahahyrinymyryky tahanamy ty ibo nyny tahaktsa! Ahanamy isapyrënikia ty ibo tsipibiaknaha.

⁷ Deus harere ty katy myi myiwy byitaha! Tsimyt-sasonaha zeka: — O uta kamysapyrêta my zeka Deus piksapywyky hÿ — tsimy. Iwa batu tyso tapetu zuba isopyk mybarapetu tsimy. Deus ta ba zik mospihikbata, atahi tsihyrinymyrêta hÿ. Hawa tsimykaranaha humo tsihyrinymyrêta. ⁸ Aty zeka amytsa mysiparikik zeka astsatu zuba pusukuknaha. Batu mektsatu zikaha. Katsa niwatihi siriktsa mysiparikik nahatsa watsa tsimaha. Hawa ha ty mysapybyitsa tsimykaranaha zeka Deus tuk batu mywahi tsimynapykyryknaha. Katsaktsa Deus hyrikoso harere bo hyÿ tsimykaranaha Deus tuk mywahi tsimynapykyryknaha.

⁹ Iwaze tysapywykynahaktsa! Ahazikarabyitsa tu tsipisapywykynaha iwaze Deus isapyrênikia ty ahabo nyny mykara. Iwatsahi mykurêtsa tsimaha. ¹⁰ Iwatsahi tyharapetsumuêhikînahaktsa kytsa! Asaktsa mytukytsa Sesus tuktsa asa bo hi tsipisapywykynaha hÿ.

Abaka mopykykze katukytsa bo mytsaty mykara.

¹¹ Abaka kamywatahawy ty okok iky. Iwahahi ipamabara ty piwatahaka. ¹² Kytsa pahahyrinymyrykynaha asa hi:

— O ahanury ty tsizyzykiknahaktsa! iwa tsimaha zeka Deus okzeka ahamysapyrêtsa tsimoziknaha — mybarapetu mykaranaha. Iwa motsasokonaha kytsa harere humo zuba. Iwaze sizubarêtsa nisisokonaha:

— O simysapyrêtsa mykaranaha. Hawa ha ty mysihyrinymyryky wasani my, Sudeutsa sopykwy bo yhÿ mykaranaha — maha. Iwa aparakbaha sisoho motsasokonaha anawahi mozihikiknaha. Sesus iharapatawy humo mysapyzekenihyrikosokda motsasokonaha zeka aparakbaha mysisukyrikiknaha ana pokso sipbyrêtsa iwatsahi ahanury tsizyzykiknahaktsa mykaranaha. ¹³ Asahi ahanury pizyzyk tsihikiknaha

iwatsahi Deus okzeka ahamysapyrëtsa tsimoziknaha baija mytsaty ahabyitsa mykaranaha, asahi Moises harere tsizubarëna bo batu yhÿ mykaranaha. Aparakbaha mozihikiknaha tihi:

— O Karatas ezektsa sinury zizyzykiknaha myharere humo abaka Sudeutsa sopykwy bo hyÿ mykaranaha — iwa mozihikiknaha hÿ.

¹⁴ Niwazubakta! Utakta Sesus Kiristu soho zuba mot-sasoko. Hawa mysapyzeken iharapatawyhyta humo zihyirizikiknaha iwa zibezenaha. Iwatsahi katsaktsa Deus okzeka mysapyrëtsa tsimoziknaha. Ana humo zuba mot-saso tsihikik. Hawa ha ty aparakbaha bo ipokzitsianikia ty mytsaty mykaranaha kahumo ka hana bo ja batu waby. Anasoho ty hi batu hÿ my. Sisopykwy humo batu hÿ my.

¹⁵ Iwatsahi myty piak zyk zeka Deus mysoho humo ba mytsaty ziky. Myty piak zyk ahabyizeka mysoho humo ba mytsaty ziky. Sesus Kiristu harere bo hyÿ tsimykaranaha ana humo zuba mytsaty mykara. Katsaktsa mysapyrëtsa tsimoziknaha Sesus humo ana humo hi zuba wasani my.

¹⁶ Ikiatsaktsa kaharere bo yhÿ tsimykaranaha. Deus bo mopamykysokoze ahasoho tihi:

— O Deus myzo Sesus tuktsa Karatas ezektsa tysis-apywyky. Aharere bo hyÿ mykaranaha iwatsahi ahumo sispirikporëtsa moziknaha. Sispirikporëtsa tu ba paikpa mytsaty zikaha tysiakusukniki tsimy — my. Ana hi Sesus tuktsa sizubarëtsa mozihikik.

¹⁷ Abaka mopykyk. Batu aty tohi zikykni. Deus wasania ty iksasozuiku. Utakta Sesus harere humo aparakbaha ziksukyrykynaha. Kapunihikrëta tu Sesus harere iksasokoze sinini ikykara. Sesus pokzi sinini ikykara kanury humo iwatahawy, ana bo hi iktsa tsimykaranaha.

Deus pahasapywyky.

¹⁸ O katukytsa ahatsyhyryze Deus bo mopamykysoko:

Karatas 6:18

27

Karatas 6:18

— O Deus mypehakatsa Sesus Kiristu Karatas ezektsa
tysisapywyky — my. Iwa mozihihik hỹ. Niwazuba. Deba.
Pauro

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

